

البهلول

تعبت !

من لف الكورة بالمقلوب برجليه

وانا نايم علي ضهري

ورسملي خطوط عرضية علي وشي

بلون الطيف

مانا البهلول ومتبهل علي الآخر

الحمل زاد علي اكتافي

واناحافي

وفوق جلدي يادوب

هدمه بتستر الموضوع

وابات بالجوع... ولا اتحرك

مالكورة دايره بالمقلوب

نفسى ادوب في نسمايه

ترد الروح

او اتشعبط في كام سلم

يطلعني لأعلي سطوح
واعدل مسار الكورة بأديه
واقطع جلدتي مني وارميها
واحط دماغي ما ادر اشي
واحلم.....

يا.....ه

نهار الدنيا حلو بشكل!!
شمسايا.....وضلايا
وليل موزون علي كيفك
سهر وبارات
وكاس وسكي
حريم ياما....بتتلعلط
ومركوبي في رجليه جديد
بيلمع
وعصاية من ذهب خالص
بتسندني

وفوق جلدي حرير اصلي
وبين صابعيني متأزح
سجار مختوم مانيش لفه !
وانا إللي راسي بتلف م الميه
كاسات الدنيا ماتأثر !!
وراسي اتركبت بدري
علي رقبه مابتلفش
وانا فوقها الكبر ماليني
ومتعنظ
وابص علي البشر من فوق
وكام حبة فلوس ارمي
ولا اتهزش !!
وانا!
انا؟!
انا ايه ؟؟؟؟؟
ياناس صحوني م الغفله

لا اسوق فيها
دانا البهلول
بالف الكورة بالمقلوب برجليه
وانا نايم علي ضهري
وفوق جلدي يادوب
هدمه بتستر الموضوع
وصورتي هناك
مرميه
في ظهر الكون؟!!